

RELATION

no. 22

DV PERE PLACIDE
de Bremond Benedictin, Che-
ualier de la Croisade, Prieur de
Torigny & de Guinguand, faite
à sa Majesté à son retour de l'Isle
de Ré, au Camp d'Estré deuant
la Rochelle.

*Du passage miraculeux de vingt-neuf
Barques, que Monsieur le Cardinal
enuoya à Monsieur de Toiras en la
Citadelle de S. Martin de Ré.*

Ensemble les combats de mer & de terre
rendus par les Anglois, pour
empescher le Conuoy.

Imprimé par le commandement des Roynes.

Se

A P A R I S,

Chez I E A N B R V N E T, dans la court
Saint Leufroy.

E T

Chez I E A N M A R T I N, au bout du Pont
S. Michel, près le Chasteau S. Ange.

M. DC. XXVII.

A V E C P E R M I S S I O N.

[Faint, illegible handwriting throughout the page, likely bleed-through from the reverse side. A small dark circular mark is visible near the center.]



RELATION DV PERE

*Placide de Bremond Benedictin, Che-
ualier de la Croisade, Prieur de Tori-
gny & de Guinguand, faite à sa
Maiesté à son retour de l'Isle de Ré,
au Camp d'Estré deuant la Rochelle.*



E seroit abuser du
temps & de la pa-
tience des Lecteurs,
de représenter au pu-
blic le faux pretexte
dont le Duc de Bouquiquan veut
colorer son entreprise temeraire, fa-
uorisant la rebellion du sieur de
Soubize contre la Majesté du Roy
son legitime seigneur. Apres la res-
ponse qui a esté faite à son Manife-
ste, il me suffira de dire que ce n'est

pas sans raison que le Sage a dit, que le peuple destitué de gouvernement est proche de sa ruine: & aussi que les affaires prospèrent quand l'Estat est conduit par vn bon Roy & par de bons Conseillers & Magistrats, conseruateurs des Loix & du bon ordre, qui sont les nerfs & les liens de la société humaine, & demonstrent qu'entre ceux qui ont iamais esté esleus & appelez aux charges publiques. Monsieur le Cardinal de Richelieu a tousiours tenu & tient le premier rang, porté qu'il est d'une droite affection enuers le Roy & le public, exempt d'auarice, d'ambition & d'enuie contre qui que ce soit & remply de science & d'eloquence, qui sont les instruments dont il se sert pour leuer toutes sortes de difficultez, & de vouloir faire voir à la France sur le pa-

5
pier ce que par l'entreprise dudit
sieur Cardinal, i'ay veu sur la mer
au milieu d'un million de mousquetades & harquebuzades, quatre ou cinq mille canonnades, mille grenades, mille pots & mille feux d'artifices qui n'ont peu empescher le rafraichissement & renuitaillemēt des Soldats qui sont dedans les Forts de la Prée, & de S. Martin, Citadelle de Ré, quelques combats & empeschemens que l'armée Angloise y ait peu apporter, lors que le secours estoit du tout desesperé par le sieur de Toiras Gouverneur, & qui commande pour sa Majesté esdits Forts & Citadelle, par le moyen dequoy tout murmure cesse.

Tel parle de l'Isle de Ré qui ne sçait de que c'est, ny ce qu'ils'en peut dire, & peu considerent que lors de la descente des Anglois & du siege,

ce lieu n'auoit rien que le nom & les traces des fondemens de ceste Citadelle, en laquelle il n'y auoit encores ny hutte ny logement, dans lequel l'on peust faire ny auoir fait aucun magasin: aussi que sa Majesté & tous ses sujets viuoient lors en la croyāce d'estre en bonne intelligence & amitié avec le Roy d'Angleterre.

Mais estant arriué au contraire Monsieur de Toiras autant courageux que fidele seruiteur de sa Majesté, n'a pas seulement defendu la Citadelle contre les Anglois: mais à la barbe des Anglois, à la veüe de leur armee de mer, & de terre, la construite & reduite au période où elle se trouue aujourd'huy, la rendue imprenable, & vne des plus importantes pieces de la Chrestienté ayant remué iour & nuict avec ses Gentil-hommes volontaires, Ca

pitaines, & Soldats que l'on a peu
trouuer sur le roc & son pourprix, sa
valeur & sa generosité luy ont fait
prendre patience iusques à souffrir
toutes choses extremes, sur l'asseu-
rance qu'il a tousiours eu que Mon-
sieur le Cardinal, aussi tost que le
têps & le vent seroit propre le seroit
secourir puissamment, de fait com-
me l'on croyoit tout perdu, voila
que le secours arriue: Car ledit sei-
gneur Cardinal ayant fait preparer
quatorze trauersins, en Oleron &
Broüage sous l'ordre de M^{rs}ieur le
Marquis de Brazé, cinq grandes
barques par la riuiera S. Benoist pres
la Trâche, sous l'ordre du Capitaine
Richardiere, dix Pinasses nouuelles
aux sables d'Olone sous l'ordre du
sieur d'Andouyn Gentil-homme
de Bayonne, cinq grandes barques,
vn grand Phlibot, au mesme lieu

sous l'ordre des Capitaines Cante-
lou & Perroteau, & icelles toutes
ramassées au port & haure des Sa-
bles, bien armez & garnis d'hom-
mes, viures, habits, & munitions
de guerre, grenades, pots & feu
d'artifices, & de toutes sortes de
commoditez nécessaires à des assie-
gez, dont le sieur Abbé de Marfil-
lac s'est peu aduiser, & selon les me-
moires & inuentaie de son Maistre,
prises par toutes les villes mariti-
mes, ports, haures & riuieres de nos
costes pour faire partir, & cheminer
au rendez-vous d'Olonc, Pinasses,
Fustes, Galiores, Chattes, Chalou-
pes, Gabarres, Phlibots, Tartanes,
& toutes autres sortes de petites Bar-
ques commodes à faire le petit tra-
iect de mer iusques à la Citadelle.
De fait arriuerent telle quantité de
Matelots que Monsieur le General
le

le Clerc, qui outre la deuotion qu'il
 a au seruice de sa Majesté, & parti-
 culierement en ceste action a mon-
 stré sa prudence, & son iugement à
 soudoyer, & entretenir tant de for-
 tes de gens differents d'humeurs. Et
 n'estant plus questió que d'auoir le
 vent, la marée & la nuit propre:
 d'autant que sans ces trois choses
 l'on ne pouuoit aller dans la Citá-
 delle, & durant deux mois entiers la
 marée estant venuë de iour, le vent
 contraire, la nuit obscure & propre
 à Pirates, & par ainsi le passage in-
 terdit par la quantité des Vaisseaux,
 Nauires, Fustes, Brigantins, Phli-
 bots, Paraches, Felins, Galiottes,
 Pinasses & Chaloupes des Anglois.
 Le sieur Prieur de Bremond par or-
 dre de Monsieur l'Euesque de Man-
 de, & Abbé de Marsillac ayant cou-
 rules Haures, du Plomb, coup de

Vache, riuieres de Maran, S. Benoist, la Tranche, Iar, Talmont, & Sables d'Olone pour faire partir les conuoys, & equipages preparez à chasque soufflee de vent, avec telle ardeur & sollicitude qu'il en perdoit le boire & le manger. En fin, Dieu ayant pitié de nous, le sixiesme d'Octobre la marée s'estant rendue propre, le vent, & la nuit favorable à l'arriuee de sa Majesté dans la Prouince qui auroit apporté ce bon-heur, trente-cinq voiles sortis du Haure des Sables sur les quatre heures du soir avec quatre cens matelots, trois cens soldats bien choisis & soixante Gentils hommes volontaires, vindrent à la rade.

monfieur Desplan marquis de Grimaud intime amy de longue main de monfieur de Toiras, l'un & l'autre dignes de la bien-veillance

du Roy, ayant depuis six semaines contribué ses soins & diligences accoustumées au service de sa Majesté, & à l'équipage de ce secours: ayant assisté de tout son pouuoir le sieur Abbé de marillac, toutes choses prestes, equpees & embarquées, sans auoir auparauant donné rien à cognoistre de son dessein à personne, disant adieu à Messieurs le Duc de la Rochefoucault, & Abbé de marillac se iette dans vne chaloupe qu'il auoit fait tenir presté à cest effect, suit ceste flotte, aborde la Margueritte, ou barque du ieune Richardiere dit Capitaine Maupas: qui seul sçachant son dessein l'attendoit, & y trouua le Cheualier de montenac, & le sieur de Villiers Lieutenant de Luslins, avec cinquante foldats bien resolus: Et aussi tost, s'en va de barque en barque

11
12.
visiter toute la flotte, prend le mot
des sieurs de Beau-lieu, Persac, &
Launay, Razilly, lesquels dans vn
mesme barque portoient l'estan-
dard au grand masts, & faisoien
conjointement d'vn commun con-
sentement la charge d'Admiral, re-
çoit d'eux l'ordre de la Bataille & de
la disposition en laquelle ceste peti-
te flotte deuoit passer, & voulan
faire le signal pour leuer l'ancre tou-
à coup, la mer s'esmeut avec vne
grosse pluye qui obligea à ietter
l'ancre au lieu de le leuer, & demeu-
rer toute la nuit à la rade d'Olon
sans pouuoir rentrer au port: l'on se
doit imaginer les incommoditez
que chacun receut, qu'on ne scau-
roit exprimer. Sur les sept heures
du matin parurent cinq Nauires de
ennemis qui venoient recognoistre
la flotte, mais n'eurent le courage

de la venir aborder. La dessus fut tenu conseil pour sçauoir si l'on rentreroit au port, & si l'on feroit des-embarquer les hommes, la plus saine opinion fut de demeurer à la rade pour attendre de la bonté de Dieu le vent fauorable en vne si importante occasion : De fait le lendemain sur les cinq à six heures du soir, Dieu protecteur de ces fideles seruiteurs du Roy, fit siffler vn vent si fauorable qu'on resolut de leuer l'ancre : Et aupara-
 uant le sieur Prieur de Bremond monta sur l'affut d'vn canon, d'où il pouuoit estre ouy de plusieurs, leur faict vne harangue pour les exhorter à bien faire, & leur dit entre autres choses, *Souuenex vous braues & genereux François que ce voyage est vn coup de partie, ou pour mieux dire vn coup d'estat : Souuenex vous qu'il fera*

autant, voire plus meritoire, que ceux que
 nos Roys, & que nos Peres ont cy-
 devant faict à la Terre Sainte, voyant
 que nous le faisons avec plus d'équité &
 de iustice : car nous n'alons pas pour con-
 querir sur autrui, mais seulement pour
 garder le nostre. le me trompe Messieurs
 & ires-chers Compagnons, nous allons
 reconquerir la Cuadelle de Re, nous l'al-
 lons raver de cet lcare temeraire : car he-
 las vous sçavez que demain elle se doit
 rendre : cet estrange fanfaron en a desjà
 prepare le triomphe, il a faict revenir le
 Millort Soubize, & autres Millorts
 Rochelous pour se trouver à la reduction
 de ceste place, & faudra-il que les sie-
 cles à venir nous puissent reprocher que
 nous ayons veu de nos yeux cest outrage
 sans nous remuer, & sans courir aucun
 hazard : hazardons nous mes amis cou-
 rageusement, afin que pour le moins nous
 ayons ce contentement & ce tesmoigna-

ge en nous mesme, que nous auons voulu
 au peril de nos vies seruir Dieu, nostre
 bon Roy, nostre patrie, & secourir ce
 braue & genereux Toyas, l'honneur
 des armes, le pere des soldats, la gloire de
 nostre nation: allons mes amis il faut pas-
 ser ou mourir; que vienne l'armée naval-
 le quand elle voudra, il s'en faudra ious-
 iours beaucoup qu'elle n'acquerre vne
 pareille reputation, veu qu'elle viendra
 avec des forces esgales, & seulemēt pour
 combattre les ennemis en mer lors qu'elle
 verra son aduantage: mais à nous cela
 n'est point permis, car differer vne heure
 c'est tout perdre, les ennemis nous atten-
 dent, il est temps ou iamaïs, non de faire
 plus tost que de dire: de faire disie de la
 confusion à l'estranger, ouire l'estonne-
 ment aux rebelles, de la faueur à nos
 amis, de la reputation à la France, &
 vne des plus importante actions dont
 le siecle à venir puisse tirer occasion d'ho-

norer nostre memoire : il est vray que c'est
 de nuit, & par ainsi possible croirez vous
 d'auoir moins d'éclat en ceste entreprise,
 & que se sera contre l'humeur de nostre
 nation, qui ne veut rien faire qu'avec ma-
 gnificences : tant s'en faut, Messieurs,
 ceste nuit sera tousiours lumineuse, puis
 que veritablement ie vous puis dire, hæc
 nox est,

Ceste nuit qui despoille les conqu-
 estes des Anglois, & affermi le courage
 des François, ceste nuit que doit debaître
 & abatre la presumption de ce desesperé,
 faire voir aux estrangers que la valeur
 des François n'est point toute dans le
 monument de nos Peres : Ceste nuit mes
 amis sera tousiours assez lumineuse &
 & esclatante, puis qu'elle sera l'aurore du
 iour qui nous fera naître en l'immortali-
 té : Ceste nuit tousiours assez honorable
 puis qu'elle n'aura point d'eclipse ny de
 tenebre

tenebre que celle de lumiere; courage sou-
 uenez-vous du mot que nous auons pris,
 viue le Roy, passer ou mourir : mourir
 c'est à dire les ennemis, car il leur faut
 passer sur le ventre, & leur faire ressan-
 tir la pesanteur de nos dextres, il s'en fait
 bien qu'elle soit à comparer à nous en
 force & en courage : & pour dire vray
 ce ne sont que des bouquins pestris avec
 de la bierre, & nous avec du vin : Coura-
 ge donc braue François, ie les voy desia
 transis de peur, saisis de crainte & d'esto-
 nement; ne voyez vous pas comme ils
 tremblent, à peine pourront ils mettre le
 feu au canon, & quoy qu'ils facent ie
 vous assure qu'il est à nous de les faire
 mourir & mourir, Dieu nous benira, car
 il est tesmoin de la iustice des armées du
 Roy, qui nous faict l'honneur en person-
 ne sur ce riuage, voir les feux & le signal
 de nostre victoire, allons doncques com-
 mancer la conqueste d'Angleterre, pour

faire en bref de ses Isles vne Prouince tributaire à la France.

Cela dit avec vne infinité de belle choses, demanda pardon à Dieu, les larmes aux yeux pour soy, & toute la compagnie salua la Vierge, fit des Oraisons iaculatoires, & des apostrophes en françois & en latin, à cause qu'il y auoit beaucoup de Messieurs de la Religion, & tous à genoux comme les Catholiques, puis donna sa benediction, & puis annōça l'Indulgence pleniere pour tous ceux qui d'un cœur contrit diroient trois fois *Iesus Maria*, en vertu de sa croisade, si que chacun s'estant embrassé & encouragé mutuellement avec la plus grande alegresse du monde, & comme desja vainqueurs & victorieux mirent les voiles au vent sur les huiet à neuf heures du soir.

Le Capitaine Maupas grandemēt
entendu à la Marine, bien cognois-
sant les terres, comme estant du païs:
& ayant passé & repassé depuis
huiet iours dans vne seule barque
au milieu des ennemis, avec Mon-
sieur le Marquis de Grimaud mena
l'aduangarde: à la droicte Messieurs
de Persac, & Rasilly, & avec eux
dans leur barque les Sieur Danery,
la Gaigne Roquemont, le Commis-
saire Calotis, à la gauche les Sieur de
Brouilly, Capitaine au Regiment
de Chapes, & de Eufac, Griboüal,
Ruignny, la Rocque Fontiers, Ion-
guieres, & plusieurs autres Gentils-
hommes volontaires; & apres eux
les quatre barques que Monsieur
le Cardinal auoit faict equiper par
le Capitaine Richardiere pere, con-
duittes par les Capitaines la Treil-
le, Odoard, Pierre Masson, &

Pierre Martin tous bons Pilottes, ayant souuent couru d'autres dangers ensemble, & qui n'ont iamais abandonné le fil en la bataille, sui-uoit apres le corps en forme de bataille composé de dix pinasses, outre les quinze autres precedentes que Monsieur Frere du Roy auoit faict venir de Bayõne par saint Florent, conduittes par le Sieur Dandouin, leur General à la teste : & le Sieur Tartasse, son Lieutenant : à la queuë autour desdites pinasses y auoit douze Trauersins, comme plus forts & plus grands : En l'arrieregarde estoit le Phlibot du Sieur de Marillac bien armé & muniõné sous la conduite du Capitaine Cantelou, & portoit le ieune Beaumont, nourry Page de Monsieur le Cardinal, avec paroles de creance, tant au Sieur de Toiras que autres Capi-

raines & volontaires de la Citadelle, apres luy estoit sa chaloupe, & cinq grand barques d'Olonne, dans lesquelles estoient quantité de Gentilshommes volontaires, & par l'ordre expres de Monsieur le Cardinal qui auoient aussi lettres & chiffres, le Sieur de Lomeras Gentilhomme de Languedoc, Enseigne au Regiment de Champagne, pour auoir passé & repassé a premiere fois avec le Sieur de Valin, en cest ordre le plus pres que nous pouuions les vns des autres, nous allions costoyans la grand terre, pour n'estre point veus ny descouuerts par les vedetes des ennemis, qui n'estoient qu'à vne lieue des Sables. Or il arriua que que comme nous allions singlants à pleines voilles, & que nous croyôs d'estre desia deuant S. Martin, Dieu fit cesser le vent tout à coup en telle

forte que nous demeurâmes pres
 de deux heures sans pouuoir aller
 ny à droit ny à gauche: alors chacun
 estonné, & croyant de demeurer à
 la mercy des ennemis, si le iour les
 surprenoit, prient Dieu, le Sieur
 Prieur sur tous, faisât vœux & prie-
 res, & se recommandant à la Vier-
 ge, luy faisant vœu, au nom du Roy,
 deluy faire bastir vne Eglise sous
 le nom de nostre Dame de bon se-
 cours, en memoire de ceste iournée
 s'il luy plaisoit leur enuoyer le vent
 fauorale: soudain ils furent exaucez
 car le vent se rafraischit, & rendit
 fort gaillard, en telle sorte que cha-
 cun ayant reprins sa piste & son or-
 dre, en moins de demye-heure ils vi-
 rent le feu que Monsieur de Toiras
 faisoit faire en la Citadelle, & à terre
 ceux que Richardiere pere faisoit
 faire à terre vis à vis del'écoigneure

qu'il falloit trauerfer: & la quittant la colte de la tranche, chafque Pillo-
te regardant fa bouffelle, ne penfant plus qu'à passer courageusement, entrent dans la forest des nauires des ennemis, les premieres sentinel-
les les ayant laiffé passer fans dire mot, apres que tout eut passé com-
mencent à les enueloper & canoner fi furieusement que l'on eut dit que c'estoit de la gresse, cependant les chaloupes & galliotes des ennemis viennent apres pour les agraffer en forte que ceux qui estoient à la grande terre croyoient tout perdu, comme aussi il y auoit de l'apparan-
ce: au contraire Monsieur de Toy-
ras esperant tousiours bien du bon-
heur du Roy & de la France, oyant le bruit de tant de canonades de part & d'autre, faiet redoubler les feux sur les bastions, & comme vn

second Iosué prie Dieu de faire ar-
 rester la mer qui s'en retournoit de
 peur que son secours ne perit tout à
 faict: & de faict il estoit en grand
 danger; car vn coup de canon em-
 porta le Chirurgien du Capitaine
 Maupas entre Monsieur le Marquis
 de Grimaud, & le Sieur Prieur de
 Bremont qui estoit au milieu de la
 barque la Croix en main, vn autre
 emporte la Misayne ou Mafts de
 devant qui tomba sur ledit Sieur
 Marquis, & vn troisieme qui perse
 la barque, & luy faict prendre quan-
 tité d'eau, dans le peril ledit Sieur
 Marquis, sans s'estonner iette son
 manteau sur le corps du Chirurgien
 descend à fonds de calle, allume vne
 chandelle avec de la mesche, &
 voyant d'où venoit le mal, avec vn
 linceul, & autres linges qu'il ren-
 contra bouche le trou, cependant
 le Prieur

le Prieur traualle à vuidier celle qui estoit à la poupe , le quatriesme coup de canon leur emporte cependant vn matelot : & incontinent quatre chaloupes , & vn lieu d'Angleterre abordent la barque: le Sieur Marquis estant remonté, ioinct le Capitaine Maupas, lequel se ressouuenant des dernieres paroles de son pere , ayant disposé ses Mousquetaires & Picquiers, donne l'ordre à ceux qui deuoient tirer ses periers & canons, & ietter les feux d'artifice , faict tenir chacun à sa poste, & deffend qu'on ne tire point qu'il ne commande, aussi tost les ennemis abordent , crians Amene, Amene, maupas son pistolet d'une main, le Capabod de l'autre, crie tire laschant son pistolet , alors toute son artillerie descharge , apres on vient aux mains & feux d'artifices,

iettez de part & d'autre, le Sieur de Grimaud, Cheualier de Montenac, & de Viliers sur les deux coste de la barque, vn Sergent sur le derriere, & le Prieur par tout se defendent si vaillammēt qu'apres vn long combat les ennemis se retirent avec beaucoup de perte, & peu des nostres, & croyants d'emporter plus d'auantage vont attaquer les Pinasses où ils trouuerent bien à qui parler: car le sieur d'Andouyn qui a fait voir au siege d'Ostade & beaucoup d'autres lieux son experience & la force de son bras, coupa la main d'abord à vn Rochelois qui luy vouloit raur son gouuernail, vn coup de perrier luy fait voler en mer son contre-mast & blesse legerement deux Matelots, à mesme temps toutes les chaloupes des ennemis au nombre de cent cin-

quante viennent fondre, qui d'un costé, qui de l'autre sur toute la flotte, l'on demeure long temps aux prises sans que les ennemis puissent entrer dans pas vne barque des nôtres, en sorte que s'estans retirez, & nous croyants estre hors de tout peril, & nous exhortans à courage les vns les autres. Voicy que d'autres difficultez se presentent, car les ennemis tiennent des grands masts de vaisseaux attachez les vns les autres, & force grands bois & cordages de vaisseau en vaisseau pour empêcher les passages, & au lieu de perdre courage chacun met la main au couteau pour couper les cables, & avec picques & halebardes, faire enfoncer les masts & bois qui les empêchoient, & par malheur Coussage contre-maistre & Lieutenant de Maupas ayant coupé avec

son Tarrabat vn grand cable qui empeschoit le passage de leur barque, ce cable tombe, & s'embarasse dans le gouuernail de la barque de Rasilly, & par vne secousse de mer d'une grande impetuosit   l'entra  ne contre la Ramberge o   ce cable estoit attach  , o   soudain il fut accroch  , & inuesty par vne douzaine de chaloupes, & apres vn grand combat voyant qu'il luy estoit impossible de plus resister, commanda plusieurs fois qu'on donnast le feu aux poudres pour ne tomber entre les mains des ennemis :    quoy on ne voulut obe  ir.

La Guette Gentil-homme nourry Page de la Reine d'Angleterre fendit vn des ennemis auparauant qu'on le rendit, enfin il fallut ceder    la force & prendre la composition que les ennemis leur offrirent, s  a-

voir dix mille escus que Monsieur de Rafilly leur a promis pour luy & tous les compagnons, les sieur Danery, Calotis, Roquemont, & la Gaigne firent des merueilles en ce combat, d'abord quelques-vns furent tuez mais point de Noblesse. Et cependant que les ennemis estoient acharnez à ce butin, vingt-neuf barques arriuerent heureusement à la porte de la Citadelle entre trois & quatre heures du matin, auf-tost la sentinelle qui estoit sur le bastion de la Reine criant qui viue, il luy fut respondu par quantité de voix esclattantes, viue le Roy : qui mirent au cœur de ceux de dedans vne grande allegresse, & vn grand desespoir en celuy des ennemis. Là vne chaloupe de la Rochelle s'estant glissée parmy nous, comme si elle eut esté des nostres, pour brûler

nostre flotte, fut recogneuë à leur iargon par le sieur Dandouyn qui s'en douta, & aussi à cause de l'impatience de Monsieur de Toiras, fait fauter tout le monde à terre & demeure avec ses mousquetaires dans la Pinasse, pour remedier à ce qui pourroit arriuer, demâde le mot & le contremot à la chaloupe Rocheloise, lequel ne le sçachant fit cognoistre ce qu'elle estoit, & à l'heure l'a charge si furieusement que plusieurs furent tuez & estropiez, & plusieurs faits prisonniers. Je laisse à penser le contentement de Monsieur de Toiras, voyant vn si beau secours inesperé, & la fleur de ses amis arriué, qu'il courut aussi tost embrasser dans l'eau au sortir de la barque, & tout le reste en suite, nostre Prieur luy dit comme ceux de Bethulie à Iudith, *ina gloria exaudiet.*

Après les premiers complimens chacun fut conduit à la hutte de quelque soldat pour se secher, ayans esté contraincts de descendre dans l'eau iusques à la ceinture.

Monsieur de Toyras distribuë tous ces nouueaux venus à tous ces vieux Heraults qui ont ieusné & souffert les fatigues avec luy pendant le siege, & prenant par la main le Sieur Marquis de Grimaud le conduit se rafraischir dans la hutte du Sieur des Estans, Capitaine de son Regiment, où ils ne furent si tost entrez qu'un boulet de canon venu de la mer, entre par la porte de ladite hutte, & tuë le Lacquais dudit Sieur des Estans, & passant entre lesdits Sieur de Toyras & de Grimaud, blesse ledit Sieur de Grimaud à la cuisse, si fauorablement qu'il n'en a gardé que deux iours le liët,

le mesme iour le Sieur de Brœuilly qui estoit entré par commandemēt de sa Majesté pour despartir quelque chose à ceux qui estoient dans la Citadelle, s'estant acquitté de sa commissiō fut ietté par terre d'une mousquetade qui luy donna dans les temples, ce fut vne grand perte, il a esté grandement regretté de Monsieur de Toyras, ses funerailles faictes à la militaire.

L'heure de huit heures estant venue à laquelle le iour precedent les Sieurs des Estangs & de Soubran nepueu de Monsieur de Vignolles, par ordre de Monsieur de Toyras, & par la necessité de toutes choses, s'estoit obligé de porter au Duc de Bouquiquan, les articles de la composition qu'il demandoit, au cas qu'il ne leur arriuaſt aucun secours: les nostres font mettre à la
pointe

pointe de leurs picques force bouteilles de vin d'Espagne, quantité de cocq-daindes & poulets, chapôs, jambons, langues de bœuf, & autres provisions, les officiers nouveaux venus de l'artillerie font tonner quantité de canonades, avec leur nouvelle poudre, & font reculer les vaisseaux qui s'estoiét approchez de prez, croyant qu'il n'y auoit plus de poudre. La marée se retire avec eux & laisse nos barques à sec: les Anglois qui sont dans l'Isle sur terre, viennent en deux bataillons pour mettre le feu à nos barques, avec quantité de feux d'artificès, ceux qui les auoient conduittes sur l'eau les sceurent bien deffendre sur terre, car ils sortent en bon ordre, font retirer l'ennemy avec beaucoup de perte & qu'ils font demeurer sur la place. Sur les trois heures apres mi-

dy, la marée reuient, les Anglois reuiennent avec leurs chaloupes & galliottes pleines d'hommes & de feux d'artifice, & à la faueur de leur canó qui tiroit incessamment, font aprocher à force de rames & auirós vn heu de cinquante tonneaux conduit par six matelots, auxquels le Duc auoit promis six cens iacobus s'ils pouuoient approcher nostre phlibot ou quelque autre barque pour donner vne incendie generalle à nostre flotte par le moyé du vét; au cōtraire le Sieur de Toyras promet cinq cens pistoles à ceux qui avec pieques & halebardes voudroient aller empescher l'aproche de ses coquins. Le Capitaine Maupas avec ses matelots & gens de marine plus confidens à la faueur de mille mousquetaires, dont Monsieur de Toyras auoit bordé la courtine, & la con-

trescarpe de la mer, fit si bien qu'il print prisonniers ceux qui nous venoient brusler, & les autres qui vouloient se sauuer dans les chaloupes furent tous tuez de l'escopeterie des nostres, ou de l'artillerie de la Citadelle, qui ne gardoit plus silence comme elle auoit faict dix-huict iours auparauant: les ennemis voyant leur dessein eludé, mettent toute leur artillerie de terre & de mer à foudroyer iour & nuict nostre petite flotte, & de faict vingt des plus grandes barques furent brisees & fracassees, & destinees au feu & aux huttes, on ne peut dire la despense de poudre qu'ils ont faict, tât ledit iour que la nuict precedente. Apres sur les neuf heures du soir, ils font iouer vne mine que Monsieur de Toiras auoit esuentee, & par ce moyen fut sans effect. Le lende-

main neuvesme tous les Anglois qui estoient dans l'Isle à sainte Marie se mettent en bataille hors la portee de nostre canon, en nombre de quelques quinze cens hommes, & font semblant de venir attaquer la demie lune saint Seurin qui est à quarante pas du fossé que ledit sieur Baron auoit fait faire & gardé par le moyen de deux lignes de communication pour conseruer le meilleur puits de l'Isle, mais depuis nous auons sceu que le Bouquinquan eust peur que les argonautes fraichement venus ne les empeschassent & fissent quelque sortie pour encloüer leur canon, ce qui fust sans doute arriué si M^{rs}ieur de Toiras n'eust esté meilleur mesnager de la vie de ses bons amis. Ce fut alors qu'ils cogneurent que nous auions des poudres & boulets,

car ceux qui s'aduançoient receurent d'autres prunes que de Brignolle, l'on vit faire iour à trauers d'un bataillon, alors on mit sur la pointe des picques trois cens calles ou bonnets ronds & plats que les Basques de Monsieur de Gramond portent, les Anglois prenoient cela pour des espauls de mouton ou fromages, la nuit se passe sans autre ceremonie. Le dixiesme, monsieur de Toiras ayant laissé cuuer le bouc d'as la colere, & croyant qu'il donneroit au temps ce qu'il n'auoit peu donner à la raison deputa le sieur de la Riuere, Puy Greffier qui a l'aage de soixante ans qu'il auoit employez au seruice de sa Majesté, est venu porter le reste de sa vieillesse à Monsieur de Toiras avec ce dernier conuoy, sort de la tranchée avec un tambour pour

aller ſçauoir des nouuelles de la mort ou priſon de nos amis. mais le Duc ne veut voir ny entendre perſonne pour nous laiſſer en inquietude, de ceux que nous ne peuſmes ſecourir pour eſtre neceſſaire de ne s'arreſter, ains de faire entrer le ſecours pour le general pluſtoſt que de s'arreſter au particulier.

Pour cela nous ne laiſſons pas de minuter noſtre retraite avec ce peu de barques qui eſtoient reſtees, pour auoir moyen de rendre cõpte à ſa Maieſté de l'eſtat de toutes choſes, & ramener les malades & bleſſez, & bouches inutiles.

Cependant noſtre Prieur va de hutte en hutte, de baſtion en baſtion, fait prendre le nom de tous les Gentils-hommes volontaires, Capitaines, Officiers des Regimens bleſſez, & eſtropiez & des def-

functs, pour lesquels il dit vne messe
solemnelle auant son depart, ceste
courtoisie a tellement obligé les as-
siegez, qu'ils se croient escripts au
liure de vie, & burinez au temple
de memoire. Promet de represen-
ter à sa Majesté tous leurs traux, de
reuenir en bref avec vn autre se-
cours auquel Monsieur le Cardinal
fait traualier, & de passer & repas-
ser en despit des Anglois, & non-
obstant quatorze taillades qu'il a
en son chapeau de coups de picques
& halebardes, & le bout de la croix
de son chapelet emporté d'vn coup
de mousquet.

Après donc auoir demeuré en-
cor dans l'Isle iusques au 14. il vit
que les ennemis ont retiré leur ca-
non de leur batterie, rembarque
leurs meubles, & pille tous les habi-
tans de l'Isle, tant Catholiques que

Huguenots, & taschoient de retirer les nauires qu'ils auoient faiet pour seruir de batterie contre la Citadelle. Il est aussi venu vn Colonel député du Bouquinquan pour venir recognoistre la mine des assiegez, sous pretexte de demander quelques prisonniers: ce que recogneu par le sieur de Toiras, qui est reue- nu, Dieu graces, en tres-bonne san- té: luy dit qu'il luy vouloit faire voir le visage de ceux que le siege auoit incommodez, fit paroistre les nouveaux venus, & au milieu d'eux nostre Prieur avec son ordre de la Croisade: & le sieur de la Riuere Puy Greffier qui auoit esté desia dás l'armée des ennemis. Et apres les complimens à la Françoisse, luy dist, Voila celuy que sa Majesté a destiné pour estre l'Archeuesque de Quantorbery, & auquel Monsieur le Car-
dinal

dinal a promis dix mille Cheualiers de ceste sorte, ie vous donne à penser si mon homme fut estonné, & ce qu'il aura peu dire à son retour.

Pour les nostres graces à Dieu il les a laissez bien munitionnez pour quatre mois pour le moins : mais beaucoup plus munis d'une ferme resolution de mourir plustost mille fois, s'ils auoient mille vies, que de faire aucune chose indigne d'un homme François : car les volontaires & Officiers nouueaux Monsieur des Roches Baritaut chef des volontaires est bien resolu d'acheuer aussi glorieusement qu'il a commencé, le Comte de Brosset son fils tout de mesme, le Baron de Montandre a reserué son bras pour charger plus furieusement les Bouquins à leur depart, qu'il ne peust pas faire à leur ar-

riuee, le fleur de la Rabateliere est
 toujours de garde par fortune en
 toutes les occasions, de sorte qu'il a
 trouué milles lauriers & milles pal-
 mes, Sainct Paul & la Tibaudiere &
 cent autres Gentil-hommes volon-
 taires qu'on verra dans le tissu de l'hi-
 stoire de ce siege, ne veulent pas qu'il
 se soit iamais rien passé dedans ny de
 hors le siege d'Ostade, qui esgalle
 celuy de S. Martin de Ré. Et quand
 à Messieurs les Capitaines Thibaud,
 des Estangs, de Montaud, Clariès, &
 du Vizan, qui sont les seuls de tout
 le Regiment avec leurs Lieutenans,
 enseignes & Sergés qui ont soustenu
 la fatigue du siege, comme ils ont
 fait vne infinité de belles actiōs qu'il
 vaut mieux honorer du silence que
 d'une loüange imparfaite: aussi n'en
 promettent-ils point que celle qu'on

pourra plustost admirer qu'imiter.
 En fin, le vent s'estant rendu propi-
 ce, le General Dandouyn avec qua-
 tre Pinasses & vn Trauersier, rame-
 na nostre Prieur à coup de Vache,
 neuf iours apres leur entree dans la
 Citadelle, il ne se peut rien adiouster
 au soing que sa Majesté a eu des ma-
 lades & blesez reuenus du siege, ny
 des caresses qu'il fit à Monsieur Dan-
 douyn, ce qui a fait naistre vn si
 grand desir au cœur de la Noblesse
 Françoisse, Soldats & Matelots qui
 sont à l'armee, que chacun n'attend
 que la commodité de pouuoir passer.
 Le Capitaine Richardiere pere, a iuré
 que si son fils retourne iamais, com-
 me l'on croit qu'il fera bien tost, Dieu
 aydant, & que les Anglois n'ayent
 prins la fuitte, qu'il le des-aduoüera
 s'il n'y retourne en plein iour. Voila

comment l'arriuee de sa Majesté a esté heureuse , tous les progres s'estans faits en sa presence.

Chacun fait à qui mieux mieux, Monsieur de Beaumont Maistre de Camp d'un Regiment , & premier Maistre d'Hostel de sa Majesté le lendemain de l'arriuee du sieur Prieur & Dandouyn , a fait passer sept grandes barques bien munitionnees de viures pour six mois au Fort de la Pree, avec quantité de bons Soldats , le tout sans perdre aucun homme , les barques & Matelots sont reuenus de mesme, les Rochelois en sont en desespoir , & les Anglois minutans leur retraite , aduoient nostre Louys pour le plus grand Prince de la terre, & le Duc de Bouquiquan emportera ce reproche d'auoir contre le droict des gens vsé d'une tres-grande

trahison & perfidie , qui est qu'il a retenu Monsieur de Saint Surin prisonnier au retour de Paris , où il auoit conduit son nepueu à sa priere , pour moyenner sa paix & obtenir la grace du sieur de Soubize de sa Majesté.

F I N.

PERMISSION.

IL est permis à Iean Brunet , & à Iean Martin, d'imprimer ou faire imprimer , vendre & distribuer vn liure , intitulé : *Relation du Pere Placide de Bremond Benedictin, Cheualier de la Croisade Prieur de Torigny & de Guinguan, fait à sa Maieité à*

son retour de l'Isle de Ré, au Camp d'Estré
 deuant la Rochelle. Du passage miracu-
 leux de 29. Barques, que Monseigneur le
 Cardinal enuoya à Monsieur de Toiras
 en la Citadelle de S. Martin de Ré:
 Ensemble les combats de mer & de terre
 rendus par les Anglois pour empescher le
 Conuoy: Et defenses sont faites à tous
 Imprimeurs & Libraires & autres de
 quelle qualité qu'ils soient d'impri-
 mer ou faire imprimer, vendre ny
 debiter dudit liure sans le consente-
 ment des susdits nommez, à peine de
 cinq cens liures d'amende, comme il
 est plus amplement porté par la Per-
 mission. Faict à Paris le 28. d'O-
 ctobre 1627.

Signé,

MOREAU.

1840

Received of the
Honble the Secretary of the
Board of Trade
the sum of £1000
for the purchase of
the land at
St. John's
in the County of
Down
the sum of £1000
being the purchase money
of the land at
St. John's
in the County of
Down
the sum of £1000
being the purchase money
of the land at
St. John's
in the County of
Down

Witness my hand and seal
this 10th day of
January 1840
at London
John Lubbock
Secretary of the Board of Trade

